

屯中稿

近體詩

輓高雄 8.1 氣爆災難中殉職消防諸公
忠烈祠前柏更青，得隨先哲未孤伶。成仁取義英魂在，長為男兒立典型。

無題
魂若桃花氣若梅，儔雲侶雪始堪栽。移根小謫相知少，不為紅塵著意開。

甲午回顧
恥言踰立未修齊，侷促愁城日月低。覩汗新來愧何事，茫茫書海一舟迷。

聽雨
料峭春還客未還，簷前點滴憶南山。猿林慣聽風兼雨，宿願原來是等閒。

秋蝶
高風摧木葉，物色感玄陰。蝶翅寒於雪，霞輝晚在林。雲深猶去去，秋老尚尋尋。
懸念千山外，瓊枝與素心。

歲末登臨遠眺
海日登樓近，風波滯後期。布帆寧仰借，鱸膾自懷思。雁遠高猶返，羈寒久未辭。
遙心知彼岸，頰蕊發新枝。

阿里山晨起
雲房晨宿起，星落掛寒松。白露侵風袂，清霜聽梵鐘。禪心應寂寞，翠色尚蒙籠。
回首天人處，秋山暗幾重。

合歡山克難關觀日出
馳車追六轡，蒼莽險峰行。岩壑陰陽構，松風太古聲。龍翻雲浪燦，日逼雪霜晴。
天地回元氣，蒸蒸枯復榮。

感兩岸三地時勢兼贈香江友人

晦矇風雨未弓身，無愧行知不帝秦。笑我魯嶼成客雁，望君青主作潛鱗。飄零花果悲餘絮，糾縵卿雲待幾春。兩地乾坤同堅守，詩書礪節各傳薪。

初心

蹇連誰與共扶將，回首家山夢未涼。人到屯蒙方立命，梅經霜雪始生香。風雲黯淡迴中夜，木石巉巖向大荒。世路亡羊仍獨覓，奚因道遠折情長。

三十二歲生辰感懷

星飛日轉奈如何，三十踪塵露電過。性僻依然堪濁酒，情頑難免是沉痾。憂時鈍劍捐功少，抱憾枯毫伏案多。故地迷魂招不得，生辰擊缶醉中歌。

梅園坐讀

羈途與爾獨相親，但敘花時不敘貧。披卷漸忘吟歎久，聽蜂偶覺往來頻。坐寒梅雪惟疏影，倚老煙霞共客身。一樹香雲拂紅紫，夕陽風裡未看真。

National Chung Hsing University

古體詩

除夕戲作

粗糲穿腸過，無物慰此夕。飯飶自何來，知是膾與炙。十載更懷歸，圍爐徒憶昔。我亦誦維摩，持鉢問香積。

枯蘭

臨風羞欲語，含頰花露垂。依依曾相慰，脈脈漸開頤。如何蘭心折，當春苦支離。空看窗前雨，誰復解幽思。

自勉

寒門出身低，不敢棄民黎。孔顏同樂處，丈夫可窮棲。食不求饜飽，四方有飢啼。矮榻三尺足，流民尚悽悽。榮華未稱羨，瞻家勉提攜。非為鄉黨譽，良知自考稽。人間多困頓，甘苦孰同齊。雙親弟妹遠，抱疚隔孤睽。仰俯俟天命，藍縷待成蹊。一燈雖微末，傳心照蒙迷。

月蝕詩 甲午年九月十五有月全蝕

羲御入杳冥，大塊凝古墨。林山亦蕭騷，月出奎宿側。寒星暗不明，闇風吹欲熄。寥天漾祆氛，夜魄蟾蜍蝕。三才閉感通，否泰為之塞。六龍奈失時，豺鼠交相賊。陰陽掩神光，離窟喜魃黑。信有牛渚犀，能照罔兩匿。老林浮紫煙，虎偃插羽翼。馳騁鬼一車，路途盤虺蜮。千載有丈夫，仗劍恨無力。心血濺月

輪，殷殷染顏色。搔首復傷時，誰畏天道仄。驕愎乏修明，無復思立極。明月既蒙迷，朝堂生荊棘。狐尾藏衣裳，社稷以為食。噫吁噉！人鬼兩不分，掌印非仁德。魑祟遂盤營，淹留此塵域。

篆刻

媧皇遺神石，萬古藏岳川。明明日光下，裊裊生雲煙。壽山五彩色，瑰若夕陽天。赤紅名雞血，紫綠呼青田。河山未開闢，六合猶渾然。陰陽未變化，變化成大千。瞑目神遊久，構畫地與天。風雲手中起，至銳撼至堅。殷殷雷隨後，殺殺電在先。火星大如斗，塵屑飛白煙。九洲紛披裂，岩漿湧黃泉。天象垂分野，七曜相危懸。鬼斧西北指，巨構拱層巔。鑿刃東南破，崩岸分陸淵。叱吒復回轉，中原勢轟然。疏鑿如帝禹，引流開長川。鬱勃生萬類，天地終完全。一吹混元氣，寥廓絕塵煙。地平原走馬，山險轟摩天。波瀾震崖海，河清可行船。一抹紅霞艷，大塊添嬌妍。江山如有待，方寸作遊仙。

中秋感懷

遙記霜華曾滿山，月浪風潮水一灣。繾綣韶年同歌舞，今宵我獨向塵寰。塵寰小謫多掩抑，悄立街頭人不識。牢落不敢告嚴慈，自唱自酬還自食。異地室居亦蕭條，空與盆花說寂寥。推窗所見惟窮巷，陋壁對峙月難邀。出門尋月歸草草，一夜竭來心又老。萬戶燈火自烜煌，不及舊時月色好。舊時月色信無瑕，邇來憂悵漫相加。六十餘年國非國，五百里外家非家。於家我亦愧不肖，於國我亦難一笑。四顧知交盡飄蓬，相思空歎不同調。月隨逝水已堪驚，月照前路看未平。縱解阮囊沽濁酒，誰人共我醉月明。

追月 農曆八月十六，俗曰追月，然隻身在外，眼前之月不欲追；欲追者，惟童時之月耳。

寒塵地，寂寥天。地物非故舊，天鏡總高懸。攬照顏顏始驚覺，十載佳節未團圓。客路已隨思憶遠，衷情每被世情牽。我問明月我非我，月華鬢鬢漸生煙。金風碧樹煙光裡，矮几取次便開筵。阿父叔孀敘閒話，阿母傳食在花前。楊桃微酸柿微澀，月餅分切作田田。柚皮鏤空猶堪用，中置彩燭狀如蓮。一燈明滅如星火，燈燈相續似雲川。夙昔歌笑即至樂，不須管兮不須弦。棄我去者情非昨，對影我獨心茫然。風物縱能長如故，嬋娟不似舊時年。拚飲明月共樽酒，今宵未須照無眠。天涯與爾惟相識，容我花月夢纏綿。

鯤鱗詩

君不見龍伯投桿白日改，劫風惡浪翻東海。沉沉墨雲慘不開，巨網圍圍香鉤在。曾釣六鰲亂天常，諸仙為之久愴惶。復毀珠蚌南海畔，不許吐瑞照神光。臍有靈鯤驚波裡，背負河山三百里。金目紫紋黯彩華，莫為芳餌盤中死。西看殘鱗滿灘頭，水族骨肉累山丘。南冥北冥遙相望，魚龍性命在十洲。雖爾運會失變化，茫

茫昏氛憂長夜。待扶搖兮時不令，流星墜兮雷叱咤。且拼死生怒濤中，脫鉤破網東復東。意氣激浪三萬尺，躍出雲雷見青穹。

遊神曲

連珠焰火欲燒雲，硝烟曳影出前軍。刀光劍陣走雷電，面刻陰陽背龍紋。朱牌繡纛掩日暮，叱吒獨顯威靈怒。通臂瞋目紫金冠，九尺神軀邁虎步。裂石聲繁鼓與笳，電音鄭衛鳴噪蛙。嚼爛紅霞向天吐，春滿長衢開血花。雪膚嬌暈入眼媚，蛇腰一擺一回醉。霓虹艷舞摩登伽，直教蒲團雲中墜。福禍固由宿世因，法身亦須鑄黃金。銀階玉闕奉神鬼，俱云紫氣真雷音。藍旗綠幟競握手，四年一呼拱北斗。道德虛靜五千言，庭前十百車馬走。巍巍宮門歸法輿，夜來清心為誰剖。

遊神木林

秋空凌凌日朗朗，玄林寥邃變氣象。扶壁仄步入洪荒，雨痕曲徑接蒼莽。青嵐寒起有無中，萬籟寂寂隱鳴蟲。露上花光凝秋紫，草色濕影兩蔥蘢。綠雲蕩漾一山碧，駁蘚鱗衣披木石。天柱扣玉琤琤響，應是造化留遺跡。上古神祇曾百千，柯枝靈樹可通天。峰頭麋鹿頻低飲，銀漢沙淺尚涓涓。山中草木忘日月，千年走馬如一歇。雷劫兵燹幾枯榮，猶有撐天老霜骨。人生底事垂垂過，長春神木究無多。山靈不解癡人問，但遣清風舞婆娑。清風為我開林霧，苔茵盡處人間路。林中隔世已千秋，林外蘭若秋如故。

詞

踏莎行

煙海流光，夕陽縈抱，雙親驚看垂垂老。登臨閒坐話家常，白頭還幸身安好。藹藹春暉，迢迢碧草，離鄉未得承歡早。忽來雛燕學翻飛，愧思樑上恩難報。

臨江仙·雁

天意飄零終定，南山曾繫情長。緇塵斂翼濯滄浪。相鳴同故侶，蘆白未驚霜。聚散又逢風色亂，遙空依舊斜陽。失群何處作家鄉。倦飛除夢裡，山月共徜徉。

臨江仙·桃木簪

破萼曾承雲露，春柔最是高枝。折來珍重寄幽思。心香惟一瓣，風雨莫相吹。髻上桃紅鮮灼，腮邊玄鬢絲絲。夢回猶記半分癡。望中人不見，幾度落花時。

鷓鴣天·甲午除夕

窗掩華燈未逐群，紅聯金字懶更新。當年宴樂同迎歲，醉後桃花欲笑人。 從

異地，託孤身，吟箋諒可寄心神。驚聞爆竹催塵夢，始覺天涯老一春。

國立中興大學 

National Chung Hsing University